

ՆԵՐԱԾՈՒԹԻՒՆ

Փէրիան (Ֆէրէյդան), որ Պարսկա—Հնդկաստանի Թեմի ամենահայտնատ և ընդարձակ գաւառն է (որպէս Ատրպատականի Թեմում Սալմաստը), ձգւած է Պարսկաստանի Սպահան քաղաքին կից, Նոր-Ջուղայից մօտաւորապէս 24 Փարսախ հեռու, արեւմտեան կողմը, մի ընդարձակ տարածութեան վրայ: Բաղկացած է բազմաթիւ հայաբնակ, պարսկաբնակ և մահմեդական վրացի (գուրջի)* գիւղերից, որոնցից 'Իարան' գիւղը գաւառապետանիստ է, ուր գաւառապետներն ամուռն են միայն պաշտօնավարում:

Սահմանները: Նրա բնական սահմաններն են.—Արեւելից՝ Բեարւանդ գաւառը Արեւմուտից՝ Բուրւարի (Բորբորուտ). Հիւսիսից՝ Գօլփայեզան, Խօնսար և Իէհաղ. Հարաւից՝ Բախտեարի լեռնաշղթան:

Բնական կազմութիւն: Գաւառն իր բնական կազմութեամբ ներկայացնում է մի խիստ գեղեցիկ պատկեր. հըսկայ լեռների և լեռնաշղթաների, վիթխարի սարերի, ժայռների և բլուրների, ընդարձակ արօտաւէտ լեռնազառտերի ու միմեանց յաջորդող խորունկ ձորերի, քարանձաւների և լայն ու նեղ հովիտների մի տարածութիւն է դա, ուր աջ ու ձախ՝ սարերի լանջերին, ձորակներում, ժայռերի կից, բլուրների կրճքին, հովիտների և ընդարձակ դաշտավայրերի վրայ փռւած են մեծ ու փոքր գիւղեր, որոնք զարդարւած են կանաչազարդ արտերով, ուռենիներով և բարդիներով, հաճելի սիգաւէտ արօտներով, գեղեցիկ, նկարչական այգիներով, գուլալ ու վճիտ գետերով, անուշահամ առուներով, սաւնորակ—կաթնահամ աղբիւրներով և կանաչազարդ սարերով, ուր ձիւնը մնում է մինչև ամառը և միայն Յունիս, Յուլիս ամիսներում հալւելով վազում է հարիւրաւոր լեռնայանջերից և ձորերից ու կազմում կարկաչուն առւակներ և գետակներ, որոնք իրենց հանդարտ ընթացքով պտոյտներ

* Սրանք բռնութեամբ մահմեդականացած վրացիներ են: